

# Cu 85 aña di edad, e gran baluarte Sr. John Hart a fayece

**RECIENTEMENTE**, e baluarte Sr. John Hart a fayece na edad di 85 aña despues cu e tabata malo pa algun tempo caba.

Cu mayornan Boneriano, John Hart a nace riba 9 di juni 1930 na Brooklyn, New York. Despues di a biba algun tempo na Merca, nan a muda y bay biba na Bonaire.

Na edad relativamente hoben, John a bay imigra na Aruba pa un miho futuro. Na april di aña 1947, John a cuminsa traha den e Departamento Maritimo na Lago. Na augustus di aña 1954, John a drenta enlace matrimonial cu Rosana Adela Alders. Nan amor a produci seis yiu. Den e mes un aña ey, John tabata co-fundador di Petroleum Workers Federation of Aruba. John a wordo nombra como secretario di sindicato nobo. Como miembro di sindicato, John a atende diferente 'leadership training' y cursonan den exterior cu a dun'e experticionan den su carera profesional.

Despues di traha un tempo na Lago, John a scoge pa bay traha na aña 1961 den Gobierno unda el a cuminsa traha na Huis van Bewaring. Pero semper e tabatin pasion sindical y John tabata sinti cu mester a bin cu un sindicato pa defende e clase trahado cu tabata traha den sector hotelero na Aruba. Asina na aña 1963 el a funda un sindicato nobo, e tempo ey yama Hotel Workers Union. John a wordo nombra presidente di dicho sindicato.

Como presidente el a atende diferente seminario, 'leadership training' na Brazil, Colombia, Mexico, Trinidad y Corsou. E fundeshi pa logra derechonan pa trahadonan den sector hotelero a wordo estableci despues cu a lanta sindicato Hotel Workers Union.

John tabata un persona hopi activo na Aruba y semper tabata disponibel pa contribui pa comunidad. Na aña 1964, el a wordo nombra secretario general di SAC.

Na aña 1965, el a wordo nombra 'penningmeester' di e stichting Saint Vincent de Paul Society pa yuda recauda fondo pa muchannan menos afortuna den San Nicolas. E tabata den bestuur tanto na Bonaire Club y Orkidia Club. Tambe e tabata manager di e banda The Strangers.

Na aña 1969, como presidente di sindicato, John a participa durante e situacion dificil 30 di mei na Corsou pa yuda yega na un solucion entre trahado y dunado di trabao. Na aña 1971, el a wordo nombra vice-presidente di SAC. El a ocupa e funcion aki pa 28 aña largo.

Na aña 1974, John tabata Presidente di General Worker Union y el a antende seminario di top leadership na Barbados y tambe Congreso di Caribbean Trade & Tourism Association na Puerto Rico, Bogota. Den e mesun aña ey, el a wordo nombra miembro di SER di Antias.

John tabata un persona cu a dedica tempo pa yuda clase trahadonan y negocia e miho contractonan colectivo na favor di trahado. Na aña 1974, el a wordo apunta como miembro di comision di referendum pa yuda organisa referendum cu a tuma luga dia 25 di

maart 1977 na [Aruba](#). John tawata miembro di Sociale Economische Raad, forma dor di Gobierno di Antias. Como miembro di SER, John a forma parti di diferente mision di Antias cu a biaha pa e.o Venezuela y Hulanda pa atende reunionnan riba asuntonan economico.

Na aña 1976, 18 di maart, un dia historico cu Aruba a inaugura su Himno y Bandera na stadion di Wilhelmina, John como presidente di sindicato a wordo invita dor di Betico Croes (d. f. m.) pa duna un discurso rib'e importancia pa un pais tin su Himno y Bandera. Na juli 1981, John a wordo nombra director di Huis van Bewaring y tabata encarga cu maneho di e prizon te ora cu el a baha cu pensioen. Dia 2 di april 1985, el a ricibi medaya di condecoracion di Ridder van Orde di Oranje Nassau den number di e Reina, como

aprecio di a contribui activamente den comunidad di Aruba.

Despues di 29 aña den servicio di Gobierno, na aña 1989, John a baha cu un pensioen bon mereci. Prome cu el a bay cu pensioen, el a coordina e proyecto di construcion di KIA y su ultimo responsabilidad tabata pa acomoda e personal y presonan na KIA.

Banda di su carera profesional, e tabata un tata ehemplar pa su famia cu semper tabata cla pa yuda su yuinan.

Despues el a dedica su bida pa sirbi Dios den Iglesia Emmanuel na Dakota hunto cu Pastor Gilbert Martes. John tabata un persona cu a dedica su bida pa su pais stima Aruba.

Comunidad di Aruba a perde un gran baluarte. Hopi forsa e dianan aki na famia Hart y cu John sosega na paz den reino di Señor.

